



cun resalva dall'approbaziun ¹

Vischnaunca Sumvitg

Protocol dalla radunonza communal nr. 01/21 dils 25-03-2021

Votants presents: 63
En procent: 6.7 %
Absolut pli: 32
Liug dalla radunonza: Sumvitg
Perstgisas: Gerou Robert Candinas, Manuela Schnoz, Rafaela Vincenz

1. Avertura e beinvegni

Il parsura communal beneventa en num dalla suprastonza communal a radunonza da vischnaunca.

President communal Armin Candinas constatescha che la radunonza communal ei cumpetenta da decider. Ella ei vegnida convocada tenor art. 31 dalla costituziun communal. Il president communal declara la radunonza da vischnaunca per aviarta. La gliesta da tractandas, publicada el FUS, vegn approbada senza objecziuns.

2. Elecziun dils dumbravuschs

Sco dumbravuschs tier la radunonza communal vegnan ils convischins Claudio Cajacob e Diego Deplazes proponi e tscharni senza cuntervuschs.

3. Protocol dalla davosa radunonza communal dils 17-12-2020

Il protocol ei staus exponius public e disponibels sin la pagina d'internet naven dils 08-01-2021 duront 30 dis. Duront il temps d'exposiziun ein neginas protestas enviars il protocol vegnidas inoltradas. Il protocol ei consequentamein approbaus.

Aquaduct Laus

700.02.0

5

4. Tractaziun ed approvaziun dil project sanaziun provediment d'aua Laus e concessiun dil credit brut da 495'000 francs

1

Il gerou Giusep Bearth presenta la fatschenta.

Il provediment d'aua da Laus ei vegnius baghegius gl'onn 1972. Sco biars auters indrezs dils provediments d'aua en nosa vischnaunca, ei era quel da Laus en bia graus pulit munglus. Gia el rapport d'inspeziun digl onn 2016 entras gl'uffeci cantunal per la segirezia da victualias e per la sanadad d'animals dil Grischun, aveva la menadra digl inspectorat per aua da beiber, Seraina Braun, nudau diversas munglonzas en siu rapport. En vesta dallas grondas investiziuns previdas lu per la sanaziun totala dil provediment d'aua da Sumvitg/Sogn Benedetg e Cumpadials/Clavadi, ei vegniu fatg cun consentiment digl uffeci cantunal, mo las remeduras las pli necessarias per saver garantir ad interim la qualitat dall'aua da beiber all'ucliva da Laus. Gl'onn vargau ha puspei giu liug la controlla periodica dils

cun resalva dall'approbaziun ²

responsabels digl uffeci per la segirezia da victualias. Il facit general da quella controlla ei staus: «Tut ils indrezs corrispundan per bia buca pli alla tecnica dad ozildi. Ei exista pertuccont higiena e construcziun per tut ils indrezs necessitad d'agir». Las lavurs da sanaziun ston esser terminadas sin la fin digl onn 2021.

Il provediment d'aua actual

Tenor il pareri digl uffeci per la segirezia da victualias e per la sanadad d'animals dil Grischun duei vegnir ponderau da realisar in cumplet niev provediment d'aua a Laus. Gl'atun vargau havein nus fatg in'inspecziun interna ensemen cugl inschignier Walter Deplazes e mirau en detagl tut ils puncts munglus menziunai el rapport d'inspecziun dil cantun. Spert essan lu stai digl avis che scarpas giu tut ed ereger in cumplet niev indrez ei per dabia buca necessari. Ils baghetgs ein per gronda part en in pulit bien stan, aschia ch'ina sanaziun tonscha bein per vegnir suenter allas pretensiuns digl uffeci cantunal. Persuenter drovan las installaziuns tecnicas egl intern in'adattaziun da rudien per contonscher las prescripziuns da higiena dil temps dad oz. El rapport vegn differenziau denter la combra d'aua Palius, il tumbin da controlla Palius, il reservuar da Laus ed il tumbin da reducziun dalla pressiu per Petergelli. Fertun ch'il tumbin da reducziun ei gia vegnius remplazzaus gl'onn vargau en connex cun las lavurs vid la via Foppas, ei il rest dils indrezs aunc da sanar. Da menziunar ei era che las fontaunas dil provediment d'aua da Laus furneschan constant aua en gronda quantiad e buna qualitat.

Il project per la sanaziun

La renovaziun dalla combra d'aua Palius cuntegn en special:

- lavurs d'impressari endadens ed ordadora
- travestgida dallas combras d'aua cun plattas da PE
- niev filter per la ventilaziun
- tut las installaziuns sanitaras
- novas lingias entochen in toc naven dalla combra
- nova colligiaziun pils mises
- nova ligiadora endadens ed ordadora
- niev esch da segirtad d'entrada

Tier la sanaziun dil reservuar Laus ei previu en special:

- lavurs da runcar
- lavurs d'impressari endadens ed ordadora
- stuppadora dalla platta da betun sur la combra d'aua
- travestgida dalla combra d'aua cun plattas da PE
- niev filter da ventilaziun
- installaziuns sanitaras (lingias d'aua, scludiders, scludider da fiug etc.)
- novas lingias entochen in toc naven dil reservuar
- ligiadora endadens ed ordadora
- niev esch da segirtad all'entrada, nova scala ed uvierchel pil tschaler da scludiders
- renovaziun installaziuns electricas
- mesiraziuns e pilotadi

Cuosts e finanziaziun

Las lavurs necessarias da quei project da sanaziun ein fetg multifaras. Tenor il calcul da cuosts dil biro d'inschignier Deplazes caschunan quellas lavurs cuosts da total 495'000 francs. Era sche quei ei ina gronda investiziun, ei la summa tuttina aunc bia pli bassa che da stuer remplazzar tut cun novs indrezs e novs baghetgs. Ils cuosts serepartan cun 457'000 francs sin cuosts da construcziun ed il rest da 38'000 francs sin cuosts generals. Las contribuziuns davart dalla polizia da fiug vegnan ad esser sche insumma fetg mudestas, damai che la segirtad per stizzar fiug vegn buca augmentada cun quella renovaziun. Forsa dat ei aunc subvenziuns davart digl uffeci da natira ed ambient, damai che Laus ha era ina part agricultura ch'ei colligiada cul provediment d'aua. La risposta digl uffeci per natira ed ambient ei denton aunc aviarta.

cun resalva dall'approbaziun ³

Proposta

La suprastanza communal propona alla radunanza communal d'approbar il project sanaziun provediment d'aua Laus e da conceder il credit brut da 495'000 francs.

Discussiun

Ord il miez dalla radunanza communal vegn buca fatg diever dalla discussiun.

Decisiun

Alla proposta dalla suprastanza communal vegn dau suatientscha.

Resultat dalla votaziun:

Gie: 62 vuschs

Na: 0 vuschs

Abstenziuns: 1 vusch

cun resalva dall'approbaziun ⁴

Manteniment baghetgs, implonts e stabiliments d'alp 800.06.0
2

5. Tractaziun ed approbaziun dil project producziun ed installaziuns d'electricitad Alp Glivers e concessiun dil credit brut da 180'000 francs 2

Il gerau Marcus Duff presenta la fatschenta.

Cull'Alp Glivers e l'Alp Naustgel posseda la vischnaunca Sumvitg duas alps cun cascharia. Las alps e las pastiras da vischnaunca ein surschadas a tscheins alla Corporaziun d'alps Sumvitg. La corporaziun d'alps ei responsabla per il manteniment ordinari. Per il manteniment extraordinari ei tenor contract denter la vischnaunca e la corporaziun d'alps la vischnaunca responsabla. La cascharia e la tegia dils pasturs dall'Alp Glivers Dado Sut ei vegnida eregida la fin dils onns 1990. Il menaschi posseda in'atgna producziun d'electricitad. L'electricitad vegn producida en ina turbina cun aua dalla Val Strem.

Il donns ed il project da sanaziun

Igl onn 2016 ha la vischnaunca realisau in stan da mulscher stabel sper la cascharia sill'Alp Glivers Dado Sut. Dapi che l'infrastructura ei vegnida baghegiada avon rodond 20 onns ed en connex cun il niev stan da mulscher ei il diever d'electricitad entras novs basegns s'augmentaus. Entras quei han ils davos onns differentas gadas stuiu vegnir fatg reparaturas vid la turbina e vid las installaziuns d'electricitad. La stad 2019 ha la turbina giu in disturbi. L'entschatta dalla stad digl onn 2020 ei la turbina reparada puspei vegnida messa en funcziun. Suenter duas jamnas ha quella puspei giu in disturbi. Per garantir il provediment d'electricitad ha muort il disturbi stuiu vegnir installau in agregat dalla firma Repower SA. Suenter il disturbi dalla stad 2020 ei il biro d'inschignier Deplazes, Surrein vegnius incaricaus cun la planisaziun e coordinaziun dallas lavurs per ina sanaziun dils indrezs d'electricitad. Per survegnir ina survesta dil stan dallas installaziuns ei l'interpresa Energia Alpina SA, Tujetsch vegnida incaricada cun in'examinaziun da tut las installaziuns d'electricitad dils baghetgs da Glivers Dado Sut e Glivers Dado Su. Entginas mesiras han allura dalla controlla stuiu vegnir fatgas immediatamein. Denter auter ha l'Energia Alpina SA fatg las suandontas constataziuns:

- Ei exista negins plans cun las installaziuns d'electricitad existentas.
- Las installaziuns existentas corrispundan buca pli allas pretensiuns dils generatur novs dalla turbina.
- Igl ei vegniu tralascchau da far controllas periodicas dallas installaziuns d'electricitad.
- Las installaziuns corrispundan buca als basegns dalla maschina da mulscher.

Sin fundament dallas constataziuns fatgas ein en rama da quest project suandontas mesiras necessarias:

- Remplazzar las installaziuns d'electricitad.
- Sill'alp da Glivers Dado Su duei vegnir fatg entginas remeduras vid la lingia d'aua per saver garantir ina megliera constanza d'aua per la turbina.
- Per il stan da mulscher dall'Alp Glivers Dado Su duei vegnir cumprau in niev generatur da diesel.
- Per meglierar la producziun d'electricitad duei la turbina vegnir sustenida cun batterias.
- Per saver garantir in mulscher adequat sto la maschina da mulscher e las installaziuns vegnir adattadas sin il niev stan.

Sper las mesiras necessarias descrettas basegna ei egl avegnir controllas periodicas dall'infrastructura entras ina persuna dil fatg ni entras in'interpresa cun cumpetenzas el sector dil provediment d'electricitad.

Cuosts e finanziaziun

Il cuosts totals muntan tenor offertas 180'000 francs e semettan ensemen sco suonda:

cun resalva dall'approbaziun

5

Scavaments per adattar lingias	frs.	6'000.--
Adattar lingias d'aua	frs.	4'000.--
Renovar producziun d'electricitad, batterias, pilotadi, documentaziun	frs.	55'000.--
Installaziuns d'electricitad e documentaziun	frs.	52'000.--
Adattaziuns indrez da mulscher	frs.	33'000.--
Controlla installaziuns d'electricitad	frs.	7'000.--
Coordinaziun da project, documentaziun etc.	frs.	7'000.--
Diversas e nunprevediu (ca. 10 %)	frs.	16'000.--
Cuosts totals	frs.	180'000.--

Tenor contract d'affittaziun denter la vischnaunca e la Corporaziun d'alps Sumvitg setracta ei tier quei project da manteniment extraordinari. Consequentamein s'auda quei project ell'obligaziun dalla vischnaunca. Tenor usanza tier investiziuns ellas alps, pia tier manteniment extraordinari, separticipescha la Corporaziun d'alps Sumvitg vid ils cuosts cun 10 %. Il project vegn ultra da quei sustenius entras il cantun cun ina contribuziun da 40'000 francs. Dacuort ei plinavon vegniu inoltrau ina damonda da sustegn al Padrinadi per vischnauncas muntagnardas. Per igl avegnir dil menaschi d'alp ein las remeduras numnadas indispensablas. Ord quei motiv ei la suprastanza communal perschuada che l'investiziun en favur dall'agricultura ei necessaria.

Proposta

La suprastanza communal propona alla radunonza communal d'approbar il project producziun ed installaziuns d'electricitad Alp Glivers e da conceder il credit brut da 180'000 francs.

Discussiun

Convischin Anton Berther constatescha ch'ins vegni a veser igl atun schebein las lavurs previdas portan la megliur giavischada.

Plinavon damonda el schebein ins sa survargar las capacitads dalla turbina cun ligiar memia bia apparaturas vid la turbina. Ultra da quei vul el informaziuns pertuccont igl agregat da mulscher da Glivers Su sco era sclariment davart la tabla pertuccont la zona da schurmetg ch'ei vegnida montada a Glivers.

Gerai Marcus Duff declara ch'ins drovi actualmeins tut l'energia dalla turbina per il mulscher. Duront il mulscher manca consequentamein forza d'electricitad per igl ulteriur diever. Quei problem duei vegnir sligiaus cun la nova batteria.

Per Glivers Su basegna ei in niev agregat. Cun quel sa vinavon vegnir mulschiu a Glivers Su.

Gerai Giusep Bearth informescha davart las zonas da schurmetg dall'aua sutterrana.

La tabla montada a Glivers munta ch'igl ei scumandau da per exempel carrar sin la via cun mieds liquids nuscheivels che savessan far donns all'aua sutterrana.

Decisiun

La proposta dalla suprastanza communal vegn sancziunada.

Resultat dalla votaziun:

Gie: 60 vuschs

Na: 0 vuschs

Abstenziuns: 3 vuschs

cun resalva dall'approbaziun ⁶

Vias da funs

800.03.0

1

6. Tractaziun dall'iniziativa «Per ina via da colligaziun tier tut ils mises dil Con» 3

Il parsura communal presenta la fatschenta.

Ils 5 da december 2018 han ils iniziants Meinrad Bearth, Conrad Candinas ed Augustin Decurtins inoltrau alla suprastanza communal l'iniziativa "Per ina via da colligaziun tier tut ils mises dil Con" ed en quei connex fatg diever dil dretg d'iniziativa tenor art. 17 dalla constituziun communal. Cun questa iniziativa pretendan ils iniziants in access tochen igl onn 2021 tier tut ils mises dil Con sco prest tut ils auters mises en vischnaunca possedan gia oz. L'iniziativa cun lur 200 suttascripziuns ademplescha las formalitads necessarias ed ei vegnida declarada per valeivla. En connex cun la meglieraziun funsila eis ei previu da baghegiar la via nr. 54 Muletg Sut – Con. Quella era oriundamein previda da baghegiar igl onn 2029. Il trassé da quella via corrispunda buc als giavischs dils iniziants. Quei damai che plirs proprietaris dils mises han suenter construcziun dalla via negin access cun vehichels entochen tier las tegias. Cunquei ch'ils iniziants eran buca cuntents cun il termin da realisaziun e muort il trassé planisau han els decidiu da far diever dil dretg d'iniziativa cun las suandontas finamiras:

- Adattar il program da baghegiar en favur dalla via dil Con.
- Adattar il trassé dalla via aschia che la via colligia tut las tegias dil Con.

Tenor text d'iniziativa dueien entochen igl onn 2021 tut ils mises dil Con haver prest il medem access sco auters mises en vischnaunca.

Program da baghegiar

La suprastanza communal ei, beinsavend che l'iniziativa sto tenor art. 17 al. 5 dalla constituziun communal vegnir suttamessa sil pli tard enteifer sis meins als votants, ladinamein sefatschentada cun las pretensiuns dils iniziants. Sin damonda dalla suprastanza communal ha la cumissiun da meglieraziun adattau il program da lavur en favur dalla via dil Con. Tenor plan actualisau eis ei previu d'ereger la via igl onn 2023. Da menziunar ei ch'il program da baghegiar ei sulettamein in instrument da planisar. Resalvau ein denter auter la concessiun dallas subvenziuns dil cantun e dalla confederaziun ed ulteriuras influenzas nunprevvedidas.

Trassé dalla via

Il project dalla meglieraziun funsila ei staus exponius publicamein naven dils 11 da matg entochen ils 11 da zercladur 2007. Sin fundament da quella exposiziun ha in proprietari da terren cumpegliau fatg protesta enviars il trassé dalla via nr. 54. Muort la protesta ha la cumissiun da meglieraziun fatg ina midada da project. Quella ei stada exponida naven dils 9 da november entochen ils 10 da december 2007. Encunter quella exposiziun ha negin fatg protesta. Consequentamein ei la via nr. 54 vegnida lubida entras il departament cantunal ils 11 d'uost 2008. Naven dils 11 da november entochen ils 12 da december 2016 ei ina midada dil project d'exposiziun vegnida exponida publicamein. Encunter quella exposiziun han dus convischins fatg protesta ils 9 da december 2016 tier la cumissiun da schazetg ed en quei connex proponiu in niev trassé per la via nr. 54. Cun disposiziun dils 2 d'avrel 2019 ha il departament per economia publica e fatgs socials communicau ch'ei seigi vegniu decidiu da buc entrar sin la protesta. Tenor motivaziun dil departament seigi il trassé buca vegnius adattaus cull'exposiziun publica dils 11 da novmeber – 12 da december 2016. Tenor decisiun dil departament havessan ils recurrents stuiu recuorer gia igl onn 2007 enviars il trassé dalla via. Questa decisiun ha la Dertgira administrativa dil cantun Grischun confirmau cun decisiun dils 8 da fenadur 2020.

Muort il cass giuridic pendent ha la suprastanza communal en accordanza culs iniziants spitgau avon che fixar il proxim agir cun l'iniziativa entochen che la decisiun dalla Dertgira administrativa ei stada sin meisa. Consequentamein ei en accordanza cun ils iniziants l'iniziativa buca vegnida suttamessa alla radunonza communal enteifer sis meins sco prescret en art. 17 al. 5 dalla constituziun communal.

cun resalva dall'approbaziun ⁷

Cura che la decisiun dalla Dertgira administrativa dil cantun Grischun ei stada sin meisa ha la suprastanza communal encuretq il discuors cun la cumissiun da meglieraziun e supplicau d'adattar il trassé dalla via tenor giavisch dils iniziants.

Ils iniziants giavischan il trassé pli el nord. Cun il trassé giavischau ein tut las tegias accessiblas cun vehichels. Quei ch'ei buca il cass cun il trassé planisau. La suprastanza communal ha capientscha per quei giavisch ed ei perquei s'engaschada tier la cumissiun da meglieraziun en favur dils iniziants. Ella ha denton stuiu schar perschader dalla cumissiun da meglieraziun ch'in adattaziun dil project ei en quella fasa buca pli pussevla.

La posiziun dalla cumissiun da meglieraziun

Il president dalla cumissiun da meglieraziun dr. Theo Maissen presenta ils principis dalla meglieraziun e la situaziun dalla via dil Con ord vesta dalla cumissiun da meglieraziun.

Il project dalla via dil Con ei vegnius exponius duas gadas, pia duront 60 dis. Duront quei temps han neginas dallas persunas che han suddascret l'iniziativa fatg protesta enviars il project. Entras l'exposiziun publica ei la procedura da cooperar vegnida risguardada. La via dil Con ei vegnida planisada tenor criteris vertents. En emprema lingia ein ils basegns dall'agricultura vegni risguardai. Plinavon eis ei vegniu risguardau ils basegns dil forestalessar. La realisaziun d'ina via tenor giavisch dils iniziants pretenda ina exposiziun publica nova che munta plinavon ina revisiun dalla repartiziun dil terren agricol. Tenor experientschas vertentas fuss ei fetg difficil d'argumentar in'otra varianta allas instanzas dil cantun e dalla confederaziun. Quei damai che mintga via basegna ina argumentaziun plausibla en favur dall'agricultura. L'argumentaziun ord vesta dall'agricultura maunca tier la varianta che vegn preferida dils iniziants. Plinavon vegness la via dil Con messa en damonda dils responsabels dil cantun e dalla confederaziun. Quei damai ch'ils aults cuosts stattan da principi buc en relaziun cun il diever agricol. Ils cuosts approximativs per la via planisada muntan rodund 840'000 francs. Consequentamein periclitass in'otra varianta respectivamein in project d'exposiziun niev la realisaziun d'in access al Con.

Resumond san ins constatar che la protesta ei vegnida inoltrada memia tard respectivamein il falliu mument. Il temps da cooperar en favur d'in auter trassé ei staus avon maun. Ils iniziants han denton buca fatg diever da quella pussevkladad.

Consequenzas tier l'approbaziun dall'iniziativa

Approbescha la radunonza communal l'iniziativa vegn la suprastanza communal a proponer ina midada dil project per mauns dalla cumissiun da meglieraziun. Muort ils motivs menziunai maunca l'argumentaziun agricola per ina midada dil project en favur dils iniziants. Ord quei motiv vegn la cumissiun da meglieraziun a refusar la proposta. Consequentamein sto la suprastanza communal tier ina decisiun negativa dalla cumissiun da meglieraziun instradar in project per ina via communal sil Con. Quei basegna en in'emprema fasa in project cun in calcul dils cuosts. Quei project survescha sco basa per ina damonda per intents da baghegiar ordeifer la zona da baghegiar (BAB). Las schanzas da retscheiver las lubientschas cantunalas per ina via ein pintgas. Sch'ei reussescha da survegnir las lubientschas sto il gremi communal competent allura approbar il project e conceder il credit necessari. Ils cuosts ein oz aunc buca enconuschents. Sin fundament dalla topografia e lunghezia dalla via vegnan ils cuosts denton ad esser pli u meins identics cun ils cuosts dalla via planisada dalla meglieraziun, pia rodund 840'000 francs. La finanziaziun per la realisaziun da questa via communal succeda tenor usanza en procedura da perimeter. Consequentamein ston ils proprietaris da terren cumpegliai separticipar vid ils cuosts dalla via. La cumissiun da meglieraziun vegn tier in tal cass a sistir il project dalla meglieraziun.

Conclusiun

La via nr. 54 Muletg Sut – Con ei vegnida lubida dallas instanzas cantunalas e federalas malgrad ils aults cuosts e la pintga muntada agricola. Quei ei in success e secapescha buca da sesez. Ina midada da project vegn buca sustenida dalla

cun resalva dall'approbaziun 8

cumissiu da meglieraziun. Consequentamein ei la suprastanza communal tier l'approbaziun dall'iniziativa obligada da perseguir la realisaziun d'ina via communal. Ils obstachels d'insumma survegnir ina lubientscha per la realisaziun d'ina via communal ein gronds. Plinavon ston la vischnaunca ed ils proprietaris da terren cumpegliai surprender ils cuosts che seresultan ord quei project. Malgrad la capientscha per la situaziun dils iniziants sa la suprastanza communal buca responsar da proponer d'approbar l'iniziativa. In'approbaziun dall'iniziativa pericletescha la realisaziun d'ina via sil Con. Quei corrispunda buca culs interess dils iniziants, dall'agricultura, dils convischins ed era buca culs interess dalla suprastanza communal.

Proposta

La suprastanza communal propona alla radunonza communal da refusar l'iniziativa «Per ina via da colligiaziun tier tut ils mises dil Con».

Discussiun

Convischin Eugen Monn pren il plaid e declara ch'el hagi era suttascrit l'iniziativa. Las davosas jamnas eis el s'occupaus pli da rudien cun la via e constatescha ch'igl ei stau in sbagl da suttascriver l'iniziativa. Cun l'approbaziun dall'iniziativa vegn la realisaziun d'in access sil Con periclitau.

Cun il project dalla meglieraziun funsila survegn il Con ina via gia igl onn 2023. Quei project vegn finanziaus per gronda part, 85 %, cun daners dalla confederaziun e dil cantun. Quei ei ina schanza unica. Schebein l'iniziativa vegn denton approvada eis ei buca clar co ei va vinavon. Bia damondas ein aviartas e sch'ei reussescha lu da realisar ina via ei buca clar. Ord quels motivs propona convischin Eugen Monn da suandar alla proposta dalla suprastanza communal e da refusar l'iniziativa.

Convischin ed iniziant Augustin Decurtins declara la situaziun dils dretgs da passadi. El declara che negin patratgi gia 25 onns avon la realisaziun vid ils access. Igl onn 2016 ei Augustin Decurtins s'interessaus tier la meglieraziun pertuccont ils dretgs da carrar tier ils mises. La meglieraziun hagi en quei connex declarau ch'il dretg da carrar vali per motivs dall'agricultura. El ha negina capientscha ch'ins sa el 21avel tschentaner buca realisar ina meglieraziun che risguarda auters interess. La meglieraziun ha duront tut quels onns adina ignorau tut las propostas per megliar in access tier ils mises dil Con. El capescha buca daco ch'ins sa buca empruar d'adattar la via el senn dils iniziants.

Decisiun

L'iniziativa vegn refusada. Consequentamein vegn la proposta dalla suprastanza communal sancziunada.

Resultat dalla votaziun:

Gie: 13 vuschs

Na: 48 vuschs

Abstenziuns: 2 vuschs

cun resalva dall'approbaziun ⁹

Diversas

7. Orientaziuns

Il gerau Giusep Bearth orientescha la radunonza davart il suadont fatg

- sur dalla revisiun dil reglament da traffic. A caschun dalla davosa radunonza communal ha convischin Pauli Albin dumandau schebein ei fuss pusseivel d'adattar la pratica da vender cartas da carrar dil di. Il schaner 2021 ha la suprastanza communal elegiu ina cumissiun ch'ei sefatschentada cun la revisiun dil reglament da traffic. Ina dallas finamiras principalas ei stau d'introducir in sistem digital da vender las lubientschas. La cumissiun ha tier sia lavur constatau ch'ei fuss prudent da far ina fasa da pilot avon che suttametter la revisiun dil reglament alla radunonza communal. Cun ina fasa da pilot ha l'administraziun communal la pusseivladad da rimnar experientschas ed aschia aunc far adattaziuns vid la lescha. Consequentamein duei uonn vegnir vendiu las lubientschas dil di sco usitau e cul niev sistem digital. Da niev san las lubientschas vegnir retratgas per SMS ni cun in app. Las lavurs preparatoricas ein aunc buca terminadas. Las proximas jamnas vegnan quellas lavurs serradas giu ed ils vischins informai cun in fegl sgulont davart il niev sistem.

8. Varia

Davart dils convischins vegn buca fatg diever dalla discussiun.

Avon che terminar la radunonza engrazia il parsura communal per la participaziun alla radunonza communal. En special engrazia il parsura communal a dr. Theo Maissen per l'informaziun davart la meglieraziun funsila.

Sumvitg, 26-03-2021

Fin dalla radunonza allas 21.55 uras

Il president communal

Igl actuar communal

.....

.....